

最低工資惹爭拗 政府責任勿外判

功夫茶

潮流興罷工，碼頭風雲之後，話唔定香港將會出現另一個工潮。

今次醞釀罷工，係乜嘢人呢？即係咁，承接政府外判清潔合約嘅環境衛生業界大聯盟話呀，要求政府補貼工資

差額，已經去信約見財經事務及庫務局局長陳家強反映訴求。大聯盟召集人表示，若然得唔到官老爺正面回覆，不排除五月一日停止向政府綜合大樓以及公園等等提供清潔服務，估計兩成公共服務設施受影響，唔講得笑㗎。

大聯盟之所以要求政府補貼工資差額，導火線係五月一日開始生效嘅最低工資新水平，由目前時薪二十八元調升至三十元。召集人認為，唔少政府外判商嘅服務合約係二〇一〇年或二〇一一年首個最低工資實施前簽訂，合約期至明年或一五年初。政府於首個最低工資實施嘅時候向外判商提供補貼，下月最低工資將會調高每小時兩元，外判商聘用一萬名清潔工人，必須向每人每月額外支付五百幾元薪金，涉及大約六千萬元開支，政府應該一如既往再次補貼外判商。

簡單咁講，外判商同政府簽訂嘅合約係以舊時薪計算，家陣新嘅最低工資水平有變，外判商打死都唔肯支付額外薪金，否則可能蝕晒大本。

講到呢度，大家必定有一個疑問，工種外判等唔等於責任外判呢？既然政府係外判商嘅老闆，即係清潔工人嘅幕後大老闆啦，家陣最低工資水平有變，政府有冇責任為外判商解決問題呢？

面對外判商嘅訴求，政府發言人係咁講嘅，當局鑑於一一年五月實施首個法定最低工資嘅獨特性，以特事特辦嘅方式作出一次性嘅特殊安排，向相關服務合約承辦商提供補貼。政府已經多次向承辦商重申，有關補貼係一次性嘅特殊安排，唔會係調整最低工資水平嘅時候再次提供補貼。

唉，睇怕勞工及福利局局長張建宗責無旁貸介入碼頭風雲之餘，亦有必要斡旋一下政府同外判商之間嘅矛盾，否則一旦清潔工人真係罷工，五一勞動節打後話唔定通街垃圾，抗菌防疫嘅「全城清潔大行動」出師未捷身先死。

計功夫茶話齋，外判商嘅訴求不無道理㗎，合約以舊時薪計算叫嘛，家陣最低工資水平有變，政府作為大老闆係咪應該幫外判商解決問題呢？若然官老爺企硬一毛不拔，外判商話唔定會以「合約精神」辦事，向工人支付舊嘅時薪二十八元，到時肯定搞到一雙泡。

講到尾，工作外判唔等於責任外判，當局最好切實實同外判商討價還價，補唔補貼或者補貼幾多，三口六面傾掂佢。總而言之，香港已經夠亂㗎喇，千祈唔好再搞出一個大頭佛呀！

政府拒補貼

清潔外判商五一罷工

【本報訊】工潮一波未平，一波又起！承接政府外判清潔合約的香港環境衛生業界大聯盟昨宣布五月一日罷工一天；拒為多個政府部門提供服務，約涉及三千名工人，因為政府拒絕補貼下月上調最低工資後引致的額外薪酬開支差額。不過，有多名不願具名的最低工資委員會成員批評聯盟「輸打贏要」，指政府兩年前實施最低工資已表明每兩年檢討一次，外判商期間承投政府合約時應考慮有關風險。

約涉及3000工人

新的最低工資水平五月一日起生效，由目前時薪二十八元調升至卅元。大聯盟於本月中發信予財經事務及庫務局，要求政府提供差額補貼加薪的額外開支，涉及約六千萬元，更指若局方未能在昨午五時前回覆，會在五月一日停止向政府部門提供清潔服務。

大聯盟召集人甄瑞嫻指，財經事務及庫務局昨日的回信中只稱，上調最低工資對承辦商的影响是相對溫和，故政府不會再像兩年前首次引入最低工資水平般，為外判商提供補貼。她批評政府涼薄，決定在五月一日發起罷工，不向多個政府部門提供清潔服務，包括食物及環境衛生署、康樂及文化事務署及房屋署等，更不排除會有進一步行動。